




transport

Department:
Transport
PROVINCE OF KWAZULU-NATAL

MNUZ. T.W. MCHUNU

UNgqongqoshe
wezokuThutha, ukuPhepha
nokuXhumanisa uMphakathi
KwaZulu-Natali



community safety & liaison

Department:
Community Safety & Liaison
PROVINCE OF KWAZULU-NATAL

KUHLOMULE ABASEMAKHAYA UMCHUNU ETHULA ISABELO MALI SIKA-R9 BILLION SOKWAKHA IMIGWAQO



UMCHUNU WETHULE U-R6.9 BILLION WOKWAKHA IMIGWAQO NAMABHRIJI *Ikhasi 2*



SELUBE NEZITHELO UHLELO LOKULETHA UXOLO EMIPHAKATHINI *Ikhasi 3*



KUZOQOPHEKA UMLANDI KUQANJWA NGAMAQHAWWE IMIGWAQO YESIFUNDAZWE *Ikhasi 4*



IZIKHULU NEZISEBENZI ZIKAHULUMENI KUMELE ZIHAMBE PHAMBILI EMKHANKASWENI WOKUPHEPHA EMGWAQENI *Ikhasi 4*

UNgqongqoshe wezokuThutha, ukuPhepha nokuXhumanisa uMphakathi uMnuz Willies Mchunu wamukele izitshudeni ezintsha zamaphoyisa amasha omgwaqo ngaphambi kokwethula isabelo mali zomnyango. La maphoyisa azoqinisa umkhakhanso wezokuphepha emgwaqeni ukuze iKwaZulu-Natali iqhubeke nokuba yisifundazwe olungafakwa kusona kwabaphula umthetho.

ISITHOMBE: Sjabu Khewla



“Road safety is our collective responsibility.”



UMCHUNU WETHULE U-R6.9 BILLION WOKWAKHA IMIGWAQO NAMABHULOHO

AKHONA SIJULA

UKUTHUTHUKISWA kwengqalasizinda yomgwaqo kusalokhu kuyinsika yokusebenza koMnyango wezokuThutha KwaZulu-Natal.

Lokhu kugqame ngenkathi uNgqongqoshe walo Mnyango uMnuz Willies Mchunu eveza ukuthi emalini engu-R9.06 billion eyabelwe umNyango kulo nyaka wezimali ka-2014/2015, ebalelwa kumaphesenti angu-75 yabelwe ukwakha nokugcina ingqalasizinda yomgwaqo isesimweni.

Imali engu-R6.9 billion wesabelo-mali wabelwe ingqalasizinda yomgwaqo.

Kule mali, u-R3.8 billion uzotshalwa ekugcineni ingqalasizinda isesimweni bese kuthi u-R2.9 billion ungene ekwakheni imigwaqo emisha nokufaka itiyela kuleyo ewubhuqu.

Lolu hlelo lwengqalasizinda kuyindlela yesigaba sesibili sentando-yeningi yokuvula



EMINYE yemisebenzi eyenziwa uMnyango ekuthuthukiseni ingqala-sizinda yomgwaqo okubalwa kuyona imigwaqo kanye namabhuloho esifundazweni sonke.

amasango kufuqwe uhlelo lwezinguquko kwezomnotho. Echaza ngalesi sabelomali, uMchunu, phakathi kokunye, uthe uMnyango wakhe uzogxila kakhulu ezinhlelweni zokwakhiwa kwemigwaqo yasemakhaya ngaphansi kwezinhlelo ezifana no-Operation kuShunquthuli.

“Kubalulekile ukuba sibheke nasemisebenzini yemigwaqo exhumanisa imiphakathi yase-

makhaya nezindawo eziyizinda zomnotho, sakhe phezu kwesisekelo esesisibonile kule minyaka engu-20 edlule yenkululeko nentando yabantu,” kusho uMchunu.

Okunye okuvelile enkulumweni kaMchunu kube wudaba lokulwa nenkinga yezikhinsi emigwaqeni (potholes).

Ngokohlelo lokuvalwa kwezikhinsi, uHulumeni usethole nethuba lokugququzela



IZITHOMBE: Thami Mkhulisa no Sbu Zungu

ukuthuthukiswa kwentsha kwezomnotho.

UMchunu ube esenxusa intsha engosomabhinisi abancane ukuba yakhe imifelandawonye ukuze ibambe iqhaza kulolu hlelo.

Enye yezindawo oluzohlolwa kuzona lolu hlelo yikuMasipala weTheku lapho kunenkinga kakhulu yezikhinsi.

“R6.9 billion wesabelo-mali wabelwe ingqalasizinda yomgwaqo”

KWANDISWA ISIBALO SAMAPHOYISA AZOQINISA EZOKUPHEPHA EMGWAQENI



IZITSHUDENI zamaphoyisa omgwaqo ziviliyela ngaphambi kokuthi zamukelwe ngokusemthethweni uNgqongqoshe uMnuz Willies uMchunu ekolishi eMgungundlovu. ISITHOMBE: Sbu Zungu

MABUYI XHOBA

UMNYANGO wezokuThutha KwaZulu-Natali uyaqhubeka nokuthathela phezulu izinhlelo zokwandisa amaphoyisa omgwaqo ngezinhloso zokuqinisekisa ukugcinwa komthetho

nokuphepha kwabasebenzisa umgwaqo nokuvikela izingozi. Kule nyanga ka-Agasti kuqalile ukuqeqeshwa kwamaphoyisa angu-91 ekolishi lamaphoyisa lalo Mnyango eMgungundlovu. Ukuqala kwalolu qeqesho

kulandela uhlelo lokuhlunga oluthathe izinyanga ezingu-14 nolwandulelwe yishwa lokudlula emhlabeni kwentsha engu-8 ngoDecember 2012. Ekhuluma ngenkathi ethula iSabelo-mali soMnyango

wakhe esiShayamthetho uNgqongqoshe uWillies Mchunu uphinde wazwakalisa ukuxolisa emindenini eyathinteka ngaleso sigameko. Uthe uMnyango wakhe uzibophezele ngokuthi kungaphinde kwenzeke into efanayo

“Sizoqinisa ezokuphepha kwamaphoyisa omgwaqo”

esikhathini esizayo.

Ube eseluleka laba asebe-phumelele ukungena emaphoyiseni wathi kumele bangawuthathi lo msebenzi njengowabantu asebelahlela ngoba sebehlelekile kweminye imikhakha yomsebenzi.

“Isifundazwe sethu sizosebenza ngokungakhathali ukubuyisa isithunzi saso sokwaziwa ngokungabekezeleli ukwephulwa kwemithetho yomgwaqo. “Ngaphezulu kwalokho sizok-

wandisa ubuchwepheshe bethu be-Average Over-Distance ku-N3 kusuka eCato Ridge kuya ekungeneni kuka-N2 ngaseThekwini bese kuba ku-N2 eLovu kuya eMthentweni.

“Sizoqhubeka nokunxena izinhlelo zobulungiswa ezingeni likazwelonke ukuba zikhiphe izigwebo eziqinile emacaleni omgwaqo,” kusho uMchunu.

Ube esezwakalisa ukukhathazeka ngokuthi umNyango wakhe esikhathini esifushane nje usulahlekelwe ngamaphoyisa omgwaqo amabili.

“Ithimba lethu lamaphoyisa lishayekile ngokushiywa ngu-Control Provincial Inspector Hamilton Nzimakwe emasontweni amabili edlule. Sisakhathazekile futhi ngokulahlekelwa ngu-Provincial Inspector Mzwandile Dinga ophelile ezandleni zezibengu ezimdubule wacina eshonile ngenkathi enza umsebenzi wakhe ku-M25, owaziwa ngo-Dumisani Makhaye Highway, ngaKwaMashu,” usho kanje.



“Road safety is our collective responsibility.”



UMCHUNU UNXUSA UBUMBANO EKULWENI NOBUGEBENGU



UMCHUNU kweminye yemihlangano yomphakathi emizamweni kaHulumeni yokungenelela ekulweni nobugebengu obuhlasele izakhamizi zakuleli.

SIPHO KHUMALO

UNGQONGQOSHE wezokuThutha, ukuPhepha nokuXhumanisa uMphakathi KwaZulu-Natali uMnuz Willies Mchunu uhlab

ikhwelo elibhekise kuzona zonke izakhamizi zakulesi sifundazwe ukuthi zisukume zizihlanganise nomkhankaso oqhubekayo wokulwa nobugebengu.

Uthe ukulwa ngokuhlanganyela kwazona zonke izinhloko zemi-

phakathi ezinganqoba lempi.

Ethula isabelo somNyango wakhe wezokuPhepha nokuXhumanisa uMphakathi sika-R181.3 million sonyaka wezimali ka-2014/15 eSishayamthetho saKwaZulu-Natali, uMchunu uveze ukuthi

eminyakeni emihlanu eyedlule uMyango wakhe izinhloko kanye nezinhloko okuhloswe ngazo ukulwa impi yobugebengu.

“Muningi umehluko osubonakala kodwa futhi kusekuningi okusamele kwenziwe. Misingi imindeni kanye nemiphakathi okusamele ihlanganyele kulo mkhankaso isebenzisane ekulweni nobugebengu. Sizolokhu sisho njalo ukuthi “Ngokuhlanganyela singabunqoba nobugebengu,” kusho uMchunu.

UMchunu ubuye wagcizelela ukubaluleka kwemindeni ukuthi ihlanganyele empini yokulwa nobugebengu, wathi indawo lapho kuqhamuka khona ubugebengu yisemakhaya uqobo.

Ucaphune umbiko we-World Bank Country Assessment on Youth Violence Policy and Programmes in South Africa (June 2012) oveza ukuthi buqhamuka kanjani ubugebengu emiphakathini.

“Kuyinto eyaziwa umhlaba wonke ukuthi indawo lapho kuka khona ubugebengu isekhaya emndenini. Awukho umndeni ongaziphilela wodwa endaweni

yawo. Kodwa yonke imindeni iphila emiphakathini.

Yonke imindeni yakha ingxenyethile yomphakathi,” kusho uMchunu.

“Sizokwenza ucwaningo ngomsebenzi wamaphoyisa ukuze sithole ukuthi unamthelela muni kulokhu”

Uphinde wabalulula, ngokwalo mbiko, ukuthi amalungu omphakathi angazibandakanyi ezenzweni zobugebengu nawo likhona iqhaza alibambayo ebugebengwini.

“Imiphakathi iyazihlonipha izigebengu eziphumelelayo, iyazivikela noma izifihle izigilamkhuba, ibe yizisulu zobugebengu noma ithintekke kukho konke lokhu,” kusho uMchunu.

UMchunu ube eseshayela amaphoyisa ihlombe ngomsebenzi omuhle awenzayo wokubopha izigilamkhuba kodwa wabuye wabalulula ukuthi kunezibalo ezinkulu zamacala agcina ngokungashushiswa kwabasolwa bawo.

SELUBE NEZITHELO UHLELO LOKULETHA UXOLO EMIPHAKATHINI



SILO samaBandla, uNdlunkulu waseMatheni noNgqongqoshe uMchunu, kubungazwa ukuthula eMatheni. ISITHOMBE: Sbu Zungu

SIPHO KHUMALO

KUYAJABULISA manje ukuthi uhlelo loMnyango wezokuPhepha nokuXhumanisa uMphakathi KwaZulu-Natali lokuxazulula izinkinga nolubizwa ngokuthi yi-Communities-In-Dialogue seluthele izithelo. Lokhu kubonakale

ekuxazululeni izinkinga zokubhekana ngeziqo zamehlo ezindaweni ezifana naseMatheni, KwaNongoma.

Lokhu kuvezwe uNgqongqoshe walo mNyango uMnuz Willies Mchunu ngesikhathi ethula isabelo-mali sika-R181.3 million esiShayamthetho. Uthe lolu hlelo luhlinzeka imiphakathi ngenkundla lapho ithola ithuba lokwabelana ngemibono bese ivumelana ngokumele kwenziwe ukuze kugcinwe indawo inokuthula.

Phakathi kwezindawo azibalile esezisizakele ngalolu hlelo uthu yiseMombeni, eMafakatini, eMtshezi, eNgudwini, eMtubatuba, KwaHlabisa, eWeenen, eRichmond naseDukuduku. “Lapho igqame khona kakhulu

le mpumelelo kube yiseMatheni, kwaNongoma, lapho kwaba nokungqubuzana kwaqala ngombango wemizila yamatekisi kwagcina sekuqubuka udlame kwafa abantu abaningi kwabuye kwaholela ekutheni izakhamizi zishiye imizi yazo zayobhaca.

“Ukungenelela komNyango wezokuPhepha nokuXhumanisa iMiphakathi kube negalelo elikhulu ekudalakeni kokuthula eMatheni. Ukusebenzisana kwemboni yezokuthutha nezinye izifundazwe ikakhulukazi emahostela esifundazweni saseGauteng, lokho kugqogquzele oNgqongqoshe abathintekayo okungowaKwaZulu-Natal, Free State, Mpumalanga nowase-Gauteng ukuba basukume bame ngezinyawo zombili ngokubambisana kulolu daba.

“Ukubhekelela ukuqhubeka kwalokhu kusebenzisana kwezifundazwe kulolu daba, kube sekwakiwa isivumelwano esibophezela bonke ngaphansi komthetho we-Intergovernmental Relations Framework Act ka-2005,” kusho uMchunu.

“Siyalibonga futhi silishayela ihlombe igalelo laMakhosi lokusebenza ngokuzikhandla ukuletha ukuthula emiphakathini”



“Unite and Together Act Against Crime.”



KUZOQOPHEKA UMLANDO KUQANJWA NGAMAQHAWE IMIGWAQO YESIFUNDAZWE



UMGWAQO osuqanjwe ngesishosovu somzabalazo uMnuz Dumisani Makhaye ungomunye oyisibonelo sohlelo oluphakanyiswe uMnyango lokuba kuqanjwe kabusha imigwaqo ngamaqhawe ezindawo. ISITHOMBE: Zingisa Hlathi

NONHLANHLA NDWANDWE

KULINDELEKE ukuthi lwamukelewe ngelikhulu isasasa emphakathini uhlelo loMnyango wezokuThutha esifundazweni lokuqamba ngamaqhawe, imigwaqo namabhriji esifundazwe.

Lolu hlelo lokuqanjwa kwemigwaqo, amabhriji nezinye izakhiwo zesifundazwe luhlose ukhlonipha amaqhawe akhiqizwe yimiphakathi, abaholi ababambe iqhaza kwezentuthuko kanye nabantu abayisibonelo emphakathini.

Lolu hlelo lumenyenzelwe nguNgqongqoshe woMnyango wezokuThutha, ukuPhepha nokuXhumanisa uMphakathi KwaZulu-Natal, uMnuz Willies Mchunu, ngesikhathi ethula isabelomali soMnyango wakhe, esiShayamthetho.

UMchunu uthe akangabazi ukuthi lolu hlelo luzogqugquzela imiphakathi ukuthi ibambe iqhaza ezinhlelweni zentuthuko futhi ikwazi ukhlonipha ngokuqamba izakhiwo ngabaholi ababambe iqhaza ekushintsheni izimpilo zomphakathi.

“Sizohlonipha amaqhawe ngokuqamba kabusha imigwaqo”

Esinye isigaba esizolandela salolu hlelo, kuzoba ngesokushintsha amagama amadala, angenazincazelo, amanye asahambisana nesikhathi sengcindezelo, aqanjwe ngamagama amasha.

“Lo msebenzi okwamanje usesigabeni sokuhlelelwa ukuthi ungasetshenzwa kanjani. Okusempeleni uqondene nokunika amagama afanele emigwaqo yethu nezinye izakhiwo. Sihlose ngalo ukuqhakambisa umlando kanye nokhlonipha amaqhawe akuleyo miphakathi eyakhele leyo ntuthuko. Ngaphambi kokuba luqale lolu hlelo, sizozala lapha esiShayamthetho, sizoninika imininingwane. Loluhlelo ngolokuqinisa ubumbano nokuzigqaja kubantu,” kusho uMchunu.

UMchunu uthe lolu wuhlelo okumele ngabe selwenzeka ngoba ivele isikhona imiphakathi esiveze iziphakamiso zokuthi iyafisa ukwetha ngamagama imigwaqo namabhriji asakhiwe ezindaweni zayo.

IZIKHULU NEZISEBENZI ZIKAHULUMENI KUMELE ZIHAMBE PHAMBILI EMKHANKASWENI WOKUPHEPHA EMGWAQENI - MCHUNU

STHEMBILE LUTHULI

UNGQONGQOSHE woMnyango wezokuThutha, ukuPhepha KwaZulu-Natal, uMnuz Willies Mchunu wethule umkhankaso okuhloswe ngawo ukuqinisekisa ukuthi iziphathimandla zikaHulumeni zihamba phambili ekuqhubeni umkhankaso wokuphepha emgwaqeni.

Lo mkhankaso wethulwe ngolwesine ezindlini zesiShayamthetho ngesikhathi uMchunu ethula isabelo mali soMnyango wakhe.

Lesi sabelomali sethulwe ngaphansi kwesiqubulo esithi: “ukuphepha emgwaqeni ngumsebenzi wethu sonke”.

UMchunu uthe uyethemba ukuthi izinhlelo zoMnyango wakhe zizolifeza iphupho lokuqeda nyanzezingozi zomgwaqo esifundazweni.

Kulokhu uMchunu ube esenxaxa amalungu esiShayamthetho noHulumeni wonke ukuba azibophezele ngokuba ngamanxusa ezokuphepha emgwaqeni.

Ubuye waphonsela inselelo uHulumeni ukuba ungene kwinkulumbo-ngoxo nezinyunyana zabasebenzi ngokuthi si-

qiniswa kanjani isandla kubasebenzi bakaHulumeni abaphula imithetho yomgwaqo.

“Lapha sibheke ukuthi zonke izinhlaka neminyango kaHulumeni ziqinisekise ukuthi izimoto zabaholi, izikhulu, nabasebenzi jikelele zisesimweni sokuba semgwaqeni ngaso sonke isikhathi.

“Kumele thina esikuHulumeni sibe isibonelo esihle kubantu”

“Kumele thina esikuHulumeni kube yithina esiba yisibonelo. Ngiphakamisa nokuthi uHulumeni udingide kabanzi udaba lokujeziswa kwabashayeli nabasebenzi abaphula umthetho womgwaqo. Lokhu kuzokwenza wonke umuntu azimisele ngokwenza umehluko, silwe nesihlaba sokufa kwabantu.

“Wonke umuntu uneqhaza okumele alibambe ukuze kuliwe nalesi sihlava esihlasele emigwaqeni yethu. Ukuphepha emgwaqeni kusengezinye zezinto



UKUBAMBA iqhaza emkhankasweni wokulwa nezingozi emigwaqeni, uMnyango uhlabe ikhwelo eminyangweni kaHulumeni eyahlukene ukuba iqinisekise ukuthi izimoto nabashayeli bazo basesimweni sokuba semgwaqeni.

ISITHOMBE: Sbu Zungu

ezibaluleke kakhulu futhi ezisadinga ukubhekwa ngeso elibukhali,” kusho uMchunu.

UMchunu uqhube wanxusa abamabhizinisi, ikakhulukazi imboni yamaloli, eyokuthutha umphakathi, abezikole zoku-

fundela ukushayela kanye nabani kazi bezimoto jikelele, ukuba bawubeke ezandleni zabo nabo umsebenzi wokuphepha emgwaqeni. Ube esexwayisa ngokuthi umNyango wakhe uzoqinisekisa ukuthi ubuyisa

isithunzi sesifundazwe sakwaZulu-Natali lapho okwaziwayo ukuthi ‘Alufakwa KwaZulu-Natal Lubuya Nesaphula-mthetho’, njengoba amaphoyisa omgwaqo ezosebenza ngokuzikhandla ukuletha ukuphepha.



“Road safety is our collective responsibility.”

